

太子少保頭品頂戴 山東巡撫 張曜謹

奏爲設局重修山東通志恭摺仰祈

聖鑒事竊臣接准會典館及兵部各咨文以奉飭續修會典有應查造輿圖與馬政兵制驛站里數鋪夫數目具令繪圖貼說咨送者臣謹卽分條查造並檄布按兩司分飭各府州縣詳細造送以憑彙核因思省志之修實與會典相表裏我

朝自雍正七年

世宗憲皇帝命天下重修通志上諸史館以備一統志之採擇山東通志卽於是時開局排纂至乾隆元年然後告成迄今又閱一百五十餘年文獻所關久未編輯國家重熙累治聲教所訖東漸爲先臣按尚書云帝光天之下至於海隅蒼生爾雅云魯有大野齊有海隅則今山東境地是也惟山東密邇畿輔拱衛神京南通江淮西接塞衛大海環其東北越海則爲遼東與朝鮮唇齒相依故昔人有云其形勢雖不及雍梁之險阻然而能爲京師重鎮者莫如山東其名山則有徂徠萊甫嶧蒙勞成而東嶽泰山東鎮沂山在焉其川澤則有濟汶會通瀋澗沂沭東西泃微山湖南旺湖而漕渠貫其中歲挽數百萬粟皆取道於茲所屬府十直隸州二州九縣九十六自昔巡方之所首至職方之所不能詳紀加以涵濡教澤二百四五十年如班史謂齊人好經術魯俗尙禮義重廉恥蓋微特闕里曲阜一區有先聖周公孔子之遺教在焉臣承乏此地候逾三年雖治河無效時切兢兢而採風問俗之餘輒

山東通志 奏摺

思採訪遺事潤色鴻業黼黻文明獨以志乘不備則一方之掌故無徵

朝廷法完令具爲治日久官吏謹守科條不特名臣循吏儒林文苑志行事蹟有待於表章卽窮鄉僻壤孝子順孫貞女節婦卽邀旌典者非有長編紀述亦恐年久則湮沒弗傳况自乾隆以後

聖駕幸魯幸鄒煌煌盛典紀述闕如至咸豐同治之間海內多事山東獨常爲京師屏蔽其間若不定教匪盜匪皆有方略可稽而黃河自咸豐五年北徙其後遂改道山東生民休戚上

歷

聖慮河防利害亟宜講求他若兵制營制之變更以及轉漕權鹽諸大政情形既今昔不同施政者苟欲有所措置誠不能不借冊府爲考鏡臣竊見比年以來畿輔與安徽湖北各省通志均已先後續纂成書山東夙稱文物之區雖中間迭經兵燹冊府不無散亡然及今按輶尙易爲力臣於從政之餘嘗借一二方聞綴學之士酌定體例竊以爲著書貴裨實用而通志爲地理之書所重首在輿圖今擬據遼內府輿圖開方之法先爲通省輿圖計一寸爲一方方得五里皆以虛空鳥道測其遠近以定準望凡山嶺爲平迤爲險峻川澤出入隄防高廣關防要隘水陸驛站城鄉道途莫不詳紀而河渠之高下曲直與海道遠近險夷必使人周歷測量而後繪爲分圖總圖俾官斯土者自行軍徵賦詰盜賊興水利欲有所事

山東通志 奏摺

卽輦然於心目之間其次則爲府州縣沿革表其義例一遵
大清一統志又次則仿歷代史書爲編年通紀爲職官表爲
地理志田賦志學校志禮儀志兵志海防志河渠志藝文志
爲人物列傳紀敘惟求典瞻而不傷繁冗編次必歸謹嚴而
不使遺漏於以廣

聖化徵國聞紀往蹟而詔來茲上本

列聖文謨武烈之昭垂旁稽列史百家之紀述一俟書成卽恭進
於

朝用符周官大司徒屬以地圖地事地俗入告之義微臣不勝
冀幸之至至此項經費所出臣當與司道設法集款不用公
項所有擬修山東通志緣由理合恭摺具陳伏乞

皇上聖鑒訓示

山東通志序

山東之有志書自前明揭學陸欽始追我

朝康熙初年巡撫趙公祥星復有續修之舉爰聘宿儒同襄厥事體裁於焉大備至雍正七年又踵前志而更修之凡六閱寒暑及乾隆元年丙辰歲大中丞岳公潯始鐫刊成書自是厥後紀載闕如識者憾焉夫志者所以志一代之典章文物因革廢興土以備太史之采風下以存鄉邦之掌故使後之人徵文考獻觀法有資所關豈淺鮮哉山左爲聖賢桑梓齊魯舊封海岱鍾靈人才輩出况自乾隆建極以還稽古右文崇儒重道

幸闕里

幸泰山

普獨通省賦役至於再三居是邦者沐浴

帝澤之覃敷涵濡

聖人之雅化是以民崇質樸俗尚敦龐士食舊德之名氏農服先疇之賦畝莫不詠仁蹈德共相安於熙皞之天世運之盛隆炳焉與三代同風矣洎乎咸豐初年沿海橫流潢池盜弄髮匪起於粵捻匪起於豫本境之教匪幅匪團匪土匪皆相應而起破臨清陷高唐干戈擾攘蹂躪將及全省之牛銅瓦廂決口黃河改道直注東省瀕河之區迭遭淹沒於是籌兵籌餉之絡繹議工議賑之紛繁世風駸駸乎不變矣然其間忠臣烈士循吏良將與夫孝子順孫貞媛節婦述其行事洵足

以勵末俗而挽頹風不及時大書特書以著於編則代遠年湮潛德幽光未由闡發豈不重可惜歟道光緒庚寅之歲山東巡撫張勳果公撫東之四年深懼東邦文獻永慨無徵遂以修志之舉奏請於

朝奉

旨俞允乃聘榮成孫佩南京卿爲總纂開局編輯未幾公薨於位佩南京卿旋之大梁此事幾同度置或作或輟者又二十年至丁未歲巡撫楊文敬公復籌鉅款展續前修仍聘孫佩南京卿暨法小山徵君商訂略例變通舊志延攬通才以司筆削囑及濟南府張漢三太守提調局事乃甫開局而文敬公移節直督法徵君遽歸道山惟佩南京卿獨肩鉅任凡曰訓典曰輿圖曰典禮曰田賦曰河防曰兵防曰藝文曰人物曰雜志分別部居俾同事諸君子各有專任京卿自董其成逐日校讐心力交瘁全書及半而京卿旋難又捐館舍先是張太守已升濟東泰武臨道繼其任者爲黃石孫太守均提調局事如故及聞孫京卿歿遂偕與諸君約不得以總纂無人遽萌惰念使一百餘年未輯之鉅製一簣功虧於是諸君子博徵繁引訂堅拾遺竭牛軛之力俾各門略具梗概可謂難矣說者謂修志難修今日山東之志爲尤難郡邑志書多未纂輯鴻儒碩學強半彫零歷年久而故事已泯沒無傳風迭經變亂之後官署之簡策摧殘私家之撰著散佚疆域之沿革屢易黃流之遷徙靡常採訪諮諏蒐羅匪易且近時

通商互市新政繁興皆開千秋未有之奇亦得附書簡端以
存崖略外誤失檢踏駁滋多竭羣策羣力之勞僅成一不完
不備之帙而復益以款項告匱無力雕鐫祇存之以作稿本
已耳雖然異日復有作者卽此本以潤色增刪固已事半功
倍從此故鄉典籍或不至隨荒煙蔓草以俱湮是又余之厚
望也夫

宣統三年辛亥十一月三品銜候選道歷城毛承霖謹序

山東通志序

德宗景皇帝御極之十二年

詔開會典館於京師我


朝之典章制度大經大法燦然畢備復徵求各省文獻以備史館之採擇越五年錢塘張勳果公巡撫山東遂有續修通志之請

朝廷許之籌款開局規模稱極盛焉顧吾東志書之興肇始於陸繼於趙再繼於岳陸志既佚今所存者惟趙岳兩志趙志成於康熙中葉岳志成於乾隆初元其時功令森嚴拘牽忌諱採取本隘重以乾隆至今百八十餘年之事蹟中更粵捻之變世家舊族藏書散失故名雖續修實同創始搜輯採訪本非旦夕所可期速勳果公歿而書局竟同虛設歲丁未泗州楊文敬公撫東乃重新整飭聘榮成孫佩南先生爲總纂手訂略例分門編輯閱六年而書成未及校定而先生遽逝道山辛亥事起遂至無人過問甲寅之冬余以辦理水災賑務往來省城詢知原稿尙存公署懼其久而佚也爰集同人捐資開局就原書略例較其舛譌補其遺漏復閱三年而始藏事排印既竣爰題數語於簡端以誌顛末云

歲次戊午夏六月

誥授光祿大夫建威將軍外務部尙書蒙古正黃旗都統出使德

和國大臣拔縣呂海寰謹序



山東通志序

東省之有志書自前明嘉靖年始其間續修者爲康熙十一年雍正七年皆奉

旨編纂自咸豐辛酉捻匪竄擾軼事舊聞大半燬於兵燹迨光緒十

七年張勳果公大中丞延請孫佩南京卿重加編校因事延
開迄未成書楊文敬公繼之仍聘佩南京卿續辦廣籌鉅款
延請名宿另行編纂時余方供職臺垣弗克身與其役乃未
幾而京卿物故國體改更余亦挂冠歸田逮乙卯年始鳩資
排印復延于梓生觀察徐庚生農部周樞清大令拾遺補闕
三閱寒暑而始克蒞事吾鄉一百八十餘年掌故賴以不墜
垂年觀此欣幸何如而尤幸諸公之勤懇相與有成也伏思
東省爲齊魯名區泰嶽之峻表海之雄孔子之道之大瞻廟
堂之禮器玉振金聲恢庠序之規模家絃戶誦固已極宇宙
之大觀爲中外所共仰已况我

朝

聖

聖相承

宸遊臨澄

天章炳耀震古鑠今東省疆域附近

京畿沐浴

聖化幾三百年輕徭薄賦廣賑獨租農民含哺鼓腹幾相忘於不知
不識之天而被服儒術者尤懷鉛握槧束身於禮義之防人

山東通志序


才蔚起科第聯翩食舊德之名氏者踵相接也是非詳著於
篇致今後之人徵文考獻徒歎篇章之剝蝕憾事迹之銷沈
幾無以信今而傳後是亦生此土者之責也夫禮教衰而風
俗靡大道晦而羣言肆末俗人心不古竟以倫理爲不足明
聖道爲不足守坐視先正之典型日就湮於邪說諛行之橫
恣難以守禮之邦亦肆爲簒竊以張其饒是固氣數之適然
亦士大夫無以貞其守也茲幸勳爲成書傳諸久遠俾後之
覽者穆然見地靈之鍾毓

聖澤之涵濡而知天道之不可誣人心之不容泯讀書明理無或蕩
軼以失其真是則吾之厚望也夫

歲次戊午夏六月

賜進士出身

誥授光祿大夫 經筵講官都察院都御史歷城張英麟謹序




山東通志序

志者何與史相通者也周禮四方之志與邦國之志同掌於史臣史其官而所書則志也故鄭曰鄭志宋曰宋志史與志名二而實則一通志卽通史尙書合虞夏商周爲一書史記上起黃帝下訖麟止爲一書南北史五代史體例略近之此鄭氏樵通志所自昉也自班孟堅創爲斷代之史史與志乃有異雖漁仲嘗議之然一代有一代之文獻久則無徵斷代之例雖志書亦宜用之固未可加以非議也卽吾魯之春秋何嘗非國史而亦何嘗非方志何嘗非斷代之書耶此誠後世之史與志所不能軼越範圍者也山東志書自乾隆丙辰成書後越百八十餘載迨光緒庚寅張勳果公來撫東土始有開局重修之舉歲丁未楊文敬公踵而行之閱時垂二十年其間不知幾經寒暑至宣統二三年間始漸次成書則甚矣著述之難也顧脫稿後未卽付梓度之高閣者又數年及乙卯年夏張振卿總憲毛稚雲觀察暨向財政楊公味雲都轉王公鹿泉談及茲事二公皆惜其功虧一簣慨然有籌助款項俾得校訂刊印之意先以三千元相付總憲觀察及乃相與商定辦法重行開局邀約于梓生觀察徐庚生主政周樞清大令李美岑學博諸君子就原稿詳加勘訂補闕正譌期臻完善未敢稍涉疏率又因欸用較鉅復由本省紳商暨昔日服官東土而近年遷調他省各鉅公與夫鄉人之統兵遊宦於外省者先後慨分清俸寄欸補助始得將

此書陸續排印書凡二百卷以宣統辛亥年爲止辛亥以後近數年間之事蹟均未列入蓋取法於斷代之例其體裁應如是也雖忝與斯役而學識寡鄙無所表襮惟同事諸君子殫心竭慮共成是書其孳孳不倦之意實有不能已於言者謹略述梗概於右用誌顛末云爾

歲次戊午夏六月前詹事府少詹事署禮部左侍郎借補翰林院侍讀學士黃縣王錫蕃謹序



山東通志序

客有問於余曰通志之修難乎易乎曰恭維曰茲之所修能一無謬誤乎曰不能也然則志之修甚難而所修又不能無謬誤必亟亟焉刊以行世何居余應之曰唯唯否否子獨不觀漢儒之傳經乎漢儒之傳經也於六籍之旨不能無謬誤也然六籍焚於秦三代之治周孔之道變亂於秦當此之時非漢儒抱殘守缺存什一於千百則六籍之旨無自而明三代之政無自而復周孔之道無自而行也故論漢儒者不暇責其謬誤而獨偉其抱殘守缺之功蓋文獻莫患乎無徵就其殘缺者而存之則謬誤可漸以理也并其殘缺者而亡之則後之人將何所藉以爲考信之資哉知此可與論通志矣今之通志蓋草創未具之書也纂錄方十之八九而佩南孫先生卽世於是鈔撮其未具之稿而上之當事非欲刊也將有待也使今之世仍爲光緒宣統之世則留此稿以待通人碩學如孫先生者重爲理董而後出之豈不甚善願事有迫不及待者則以今昔之勞殊也夫通志之特例有一首

列聖訓典尊王也次

至聖世紀宗聖也聖蹟王章同條共貫然後法治備而風教明就山東而論州郡有罷置而罷置之者天子也租賦有輕重而輕重之者天子也兵衛之制有興革而興革之者天子也典禮科目有舉廢而舉廢之者天子也下至一臣之死忠一民之守義匹夫匹婦之孝其親殉其夫旌寵而褒揚之者亦天子

也而天子之所以省方善俗育才化民者實莫不本於孔子之道焉太史公序其作孔子世家云仲尼悼禮廢樂崩追修經術以達王道匡亂世反之於正然則孔子之道卽王道也尊王所以宗聖宗孔子所以尊天子也是故一邦之政舉繫之王則肯乎一王之法者無由而維則九流之學悉衷諸聖則雖危言日出亦無由亂朱紫而混淆渾此其爲例之純有非尋常方志所可及者益歎佩南先生之識之過人遠矣乃先生歿不數載而國體遽變百王相嬗之制六經共由之道向所筆之於書以爲衆目之綱維衆篇之主宰者俯仰之間已成陳迹固非始事時所及料也曾湘鄉謂功名之際有天人嗚呼豈獨功名之際爲然卽一著作之成就其遭際亦若有天焉是編也自茲以往宜無有過而問者矣然或有人焉不忍其散亡而終成之必將變易其體裁顛倒其取舍進朱家之冒禁而黜黃生輟固之談經也賢少正卯之辨博而譏魯司寇之失刑也何則天運有廢興斯人心有向背夏葛之不能強以服裘夜行之不能望其就日夫人而知之矣彼操翰以從事者又安能當無王之世而責其尊王當百氏爭鳴之日而寬其宗孔子哉此則孫先生之所惻而後死者所大懼也故今之亟亟爲此者不過欲存其真免將來之竄亂而已豈暇計其謬誤邪且漢儒之傳經尙不能無謬誤况後之人聰明才力萬萬不及漢儒而舉吾東數千年來賢聖之所留遺一一掇拾而整齊之其不能無所抵牾外錯固然雖

大雅宏達加以指撝其又奚辭而或乃比其功於抱殘守缺
則是不虞之譽亦非當局所敢受也客退乃書之以爲序

歲次戊午

賜進士出身前度支部山西司主事歷城徐金銘謹序

山東通志略例

卷首

列聖訓典
至聖世紀

輿圖第一

通志一之一

凡輿圖皆測算以得其左右遠近相距之度乃案開方之法而爲之圖其計里以鳥道之數定之爲總圖一分圖一百有二十方各十里山川則案其脈絡圖之道路則案其迂直圖之古城之有阡者圖之市鎮之大者圖之村社之近驛路及接壤鄰封者圖之

通紀第二

通志二之一

凡通紀以編年之體爲之歲有豐歉則書有祥異則書有大政則書有水旱兵戎則書其見於前志者以時附焉

疆域志第三

通志三之一

凡疆域正其方位計其廣袤詳其四至八到合歷代地志之分合而攷之曰沿革表次曰城池曰封建曰山川曰形勝曰古蹟曰風俗曰物產則各志所同惟山必考其支幹水必考其原委形勝必考其關隘與其險夷之實而後書之

職官志第四

通志四之一

編其名籍曰表詳其制度曰攷記其政蹟曰傳自統部以下凡官之正任者皆志之

山東通志 略例

田賦志第五

通志五之一

田賦所重曰戶口曰稅則曰倉儲曰荒政其與田賦相因者曰鹽法曰關榷皆詳其輕重多寡及其歲入動支起運存留之數以四柱核之而書於冊其各府州縣所用權衡度量則爲之表以稽其數

學校志第六

通志六之一

志學校貢舉之制及學額學田之數其貢舉名籍則依科編年而爲之表武科亦如之

典禮志第七

通志七之一

凡典禮行於山東者有闕里釋奠之禮有時巡祭泰嶽之禮有遣官祭告之禮皆宜特書其他慶賀之禮受朔之禮迎春之禮耕藉之禮救護之禮講約之禮鄉飲酒之禮則詳其節文與其器數而樂制樂器樂章附焉

兵防志第八

通志八之一

兵事之大者曰駐防曰海防皆詳其汛地蒐其軍實而爲之攷其官制則有表而營制驛站鋪遞亦類列焉

河防志第九

通志九之一

河防依年編載皆攷其疏濬之法而書之並先爲表以便觀覽漕運則別志之海運又別志之

藝文志第十

通志十之一

曰經籍曰金石並各爲卷而分上下焉經籍詳其卷數與其解題金石則錄其目並撰者書者及其歲月備志之皆

分存佚與前人所釋注於冊以備參攷舊志所錄詩文不

入此類

人物志第十一

通志十一之一

特例二曰先賢傳曰兩漢經師通例八曰名臣曰循吏曰儒林曰文苑曰忠義曰獨行曰藝術曰列女凡近人列傳見國史者錄之見碑碣者錄之見他省名宦者錄之見刻行集部者錄之凡錄皆注其所出

雜志第十二

通志十二之一

雜志之類五曰軼聞曰瑣事曰流寓曰寺觀曰仙釋而以舊志序例題名終焉

凡各志有表有碣有紀載皆先爲長編稽之正史以溯本原攷之國朝官書以昭法守再參之雜史別集以及私家撰述以探討其因革損益之迹與夫詳略異同之故乃定著於冊皆注其所出於下

增識

一疆域志原稿無建置一門于君梓生謂宜補纂商之同局諸君僉以爲可今書中所載者卽于君手訂稿也

一疆域志物產一門原稿皆逐條登載今改爲表似較清晰一職官志表及學校之選舉表因排印時該印刷公司無六

號小字經監理與之往返熟商主持遷就改爲兩截通用二號四號字所印非原表舊式頗於體例有乖惟成書期

迫兼之籌款維艱無力改印良用歉然

一法徵君筱山孫京卿佩南張先生昭潛所著書藝文志原稿俱不載體例應爾今志中所列三君書皆此次刊印時

所補入

一人物志凡近人列傳據略例應皆注所出今檢原稿有注者有不注者此次排印爲時倉猝亦未能一一爲之補注

閱者諒之

一人物志中列女一門人數最多原稿編次亦最爲凌雜無序今所列者皆就原稿逐一改編刪繁出重補其脫漏則

周君樞清之力爲多

